

新元史

第四十册



列傳第五十

新元史卷之一百五十三

賜進士出身日講起居注官翰林院侍讀國史館纂修膠州柯劭忞撰

田嗣叔

子成

孟德

義

鄭義

江

鞏彥暉

信

劉恩

石高山

隋世昌

賀祉

楚鼎

張均

王昔刺

甯

李天祐

田嗣叔字起宗其先平陽趙城人後徙中山有至性侍母疾四十餘日衣不解帶歲飢以粟貸貧民不能償卽

取券焚之金末河北盜起嗣叔聚眾自保後降於睿宗
賜金符授行軍千戶每戰率所部爲先鋒號敢死軍後
與金兵遇於馬黃陂嗣叔擣其中軍金兵大亂俄伏發
倉卒爲流矢所中創甚以忠孝勉其二子言訖而卒二
子子實子成子成勇悍多智略從父攻城略地身先士
卒言於元帥田鎮海留俘衆有工藝者備任使鎮海奏
聞從之命閱實未幾饒不繼將屠其老弱及不習工藝
者子成復進言兵爲拯民焚溺臨陣降者尙不可殺已
爲民而殺之可乎散於河北使自食其力足以結人心
又從之活二千餘家號種田戶太宗命其兄子實爲總

管領之子成佩父金符爲弘州人匠總管後致仕卒子實孫忠良見藝術傳

孟德濟南人由鄒平縣令淄州節度使累官至同知濟南路事太宗八年諸王闊端命德爲元帥佩金符領濟南軍攻宋徐州光州降其衆六皇后稱制按只台大王以德爲萬戶攻濠蘄黃等州憲宗三年命德守睢州五年移守海州宋安撫呂文德寇邊德敗之俘其太尉劉海又與子義從世祖攻鄂州先登中統三年從征李璫璫平德以老告歸義襲爲萬戶領兵守沂鄒四年賜虎符至元元年城鄒六年從山東統軍帖赤攻五河口宋

軍拒南岸義率兵渡河擊之宋軍敗走九年遷宿州萬戶十一年宋制置夏貴攻正陽義奪其戰艦數艘貴遁去十二年從攻楊子橋有功十三年改守杭州九月從下福建溫台等處十四年授瑞州路達魯花赤十月從鎮閩州十六年授招討使二十二年復爲沂郯萬戶元貞元年以老辭職子智襲授三珠虎符宣武將軍爲萬戶延祐二年進明威將軍以病去職子安世襲

鄭義冀州棗強人太師木華黎平河北義帥其鄉人迎降授虎衛上將軍元州路兵馬都元帥兼景州軍民人匠長官佩金符從伐金戰歿二弟曰德溫曰甫德溫襲

職從攻徐州陷陣而死于澤襲從萬戶史天澤數有功
年老弟江代其職世祖北征賜金符授侍衛親軍副都
指揮使判武衛軍事兼景州軍民人匠長官中統三年
李壇據濟南叛世祖令各州縣長官子弟充千戶於是
以江子郇爲千戶領景州新僉軍千餘人敗賊衆于馬
馬橋壇平郇以例罷擢江爲都指揮使賜虎符尋改左
衛至元八年從攻襄陽歿于陣郇襲其職甫以戰功遷
同知冀州節度使事兼管民萬戶二子渤襲都元帥諡
宣靖灋性高潔不樂仕進灋子郇累官通議大夫奉元
路總管

鞏彥暉易州人與兄彥榮俱以武勇稱彥榮以百戶隸千戶何伯祥麾下累有戰功後告老以彥暉代之諸軍伐宋彥暉從破棗陽斬首甚衆萬戶張柔駐曹武鎮彥暉與伯祥別將一軍破大洪諸寨宋人選兵二萬救之彥暉與伯祥逆戰斬首五百級生擒其將曹路分等是夜宋兵來攻彥暉率甲士三十人拒之敵潰走擒其主將以歸戰光州柔軍于東北夜二鼓命彥暉率勁卒二百伏西南五鼓東北聲振天地彥暉植梯先登衆繼之破其外城遂急攻并其子城破之戰滁州彥暉率浮渾脫者十人夜渡塹入欄馬牆殺守軍三鋪焚其東南角

排寨木簾大軍繼之比曉拔其城從大軍攻黃州諸將
壁壘未定柔遣彥暉伏甲二百於赤壁之下至夜宋人
果水陸並進彥暉等俟其半過擊之敵奔潰生擒十七
人師還又破張家寨從攻壽州奪其門生擒三人以出
從攻泗州諸將集城下爲塹水所阻兩軍交射如雨彥
暉被重甲徑渡敵將來禦彥暉刺其胷搏殺之衆畢渡
克其外城尋登其月城彥暉部將顧伯祥陷城中不能
出乃與驍將王進反求之翼伯祥以歸事聞賜彥暉銀
符憲宗九年世祖伐宋渡江次武昌宋援兵四集來挑
戰彥暉逐之中伏圍彥暉數匝彥暉矢盡短兵接身被

重創度不免遂自投水中敵援之出載歸江州見宋將
不屈問以事不對竟死年五十六長子信襲授銀符易
州等處管軍總把中統三年從征李璫至元四年從元
帥阿朮南征九年從攻樊城先登奪其土城焚西南角
樓十一年從丞相伯顏攻沙陽堡率勇士五十人焚其
寨遂破之是年從渡江直抵鄂州下擒宋將江路分以
歸十二年戰丁家洲殺宋兵七十餘人奪戰艦二江南
平以功擢武略將軍管軍千戶鎮太平州十六年以疾
辭子思明思溫思恭思明初患目疾以思溫襲及思溫
卒而思明疾愈復以思明襲思明卒以思恭襲改懷孟

萬戶府管軍下千戶佩金符

劉恩字仁甫洺州洺水人後徙威州恩以材武隸軍籍累功爲百戶俄遷管軍總管佩銀符太傅府經歷從伐蜀數有戰功中統三年都元帥紐璘遣恩受劉整降賜金符至元三年宋將以戰船五百艘載甲士三萬人屯於江上游先以一萬人據雲頂山欲取漢州恩率千人渡江與戰敗之授成都路管軍萬戶六年從平章賽典赤攻嘉定過九頂山與宋軍遇生擒其部將十八人械送京師九年從皇子西平王行省也速帶兒征建都恩將游兵爲先鋒一日三戰皆捷時大軍久駐食且盡恩

招諭諸蠻得糧三萬石牛羊二萬頭士氣益振建都因
山爲城山有七頂恩奪其五并斷其汲道建都乃降入
朝升管軍萬戶戊眉州十二年咎萬壽以嘉定降恩移
戍嘉定安西王遣使召恩至六盤山問曰江南已平四
川未下奈何恩曰以不徇私之重臣奉詔督責之則半
年可下矣王卽遣恩與木兒赤乘傳以聞帝然之命丞
相不花等行樞密院於西川授恩同僉院事十五年重
慶降不花遣恩招降反側旬月之間得大小州縣六十
四入朝賞賚有加授四川西道宣慰使改副都元帥率
蒙古漢軍萬人征幹端進都元帥宣慰使如故賜宿烈

孫皮衣一錦衣一及弓刀諸物師次甘州奉詔留屯得粟二萬餘石十八年命恩進兵幹端海都將玉論亦撒率兵萬人拒戰游騎先至恩設伏以待大敗之海都又遣八把以兵三萬來攻恩料衆寡不敵斂兵而退二十二年授僉行樞密院事卒子德祿襲成都管軍萬戶石高山德興人父忽魯虎從太祖定中原太宗賜以東昌廣平四千餘戶遂徙居廣平之洺水中統三年高山因平章塔察兒入見世祖因奏曰昔太祖皇帝所集按察兒孛羅窟里台孛羅海拔都闊闊不花五部探馬赤軍金亡之後散居牧地多有人民籍者宜加招集以備

驅策帝大悅曰聞卿此言猶寐而覺卽命與諸路招之
旣籍其數仍命高山佩銀符領之四年授管軍總管鎮
息州軍令嚴肅寇不敢犯賜金符獎之至元八年從取
光州克棗陽進攻襄樊皆有功十年從阿朮略地淮南
十一年從平江南以功遷顯武將軍十二年冬丞相伯
顏命以所部兵取甯國下令無虜掠旣至城下喻以禍
福守將開門降秋毫無犯復從至焦山與宋將孫虎臣
張世傑轉戰百餘里殺獲甚多賜金虎符進信武將軍
鎮高郵伯顏朝京師帝問有瘦而善戰者朕忘其名伯
顏以高山對且盛言其功帝卽召見命高山自擇一大

郡以佚老高山辭曰臣筋力尙壯猶能爲國驅馳豈敢爲自安計帝大悅進顯武將軍率所部北征屯亦脫山十六年命同忽都魯領三衛軍戍和林屯田以給軍儲二十四年從討乃顏有功賜三珠虎符蒙古侍衛親軍都指揮使守衛東宮成宗憫其老以其子闊闊不花襲職賜鈔三百錠大德七年卒於家年七十六

隋世昌其先登州棲霞人父寶徙萊陽金末管軍都統領鎮行村海口太宗下山東寶迎降授萊陽令歷萊州節度判官終高密令世昌其第四子也善騎射身長八尺鍛渾鐵爲鎗重四十餘斤能左右擊刺選充隊長宋

兵攻海州世昌戰却之從攻漣水世昌樹雲梯攀緣而上衆從之遂克其城授馬軍千戶中統元年宋將夏貴軍淮南新城世昌夜乘艨艟抵城下宋兵出戰斬首數百級未幾漣水復叛歸宋世昌軍於東馬寨擊敗宋兵三年改步軍千戶還鎮行村海口至元元年朝議分揀正軍奧魯授萊陽縣諸軍奧魯長官七年遷淄萊萬戶府副都撫鎮守萬山堡建言修一字城以圍襄陽遷管軍千戶九年敗宋兵于鹿門山元帥劉整築新城使世昌總其役世昌立礮簾於樊城攔馬牆外夜大雪城中矢石如雨世昌不肯卻礮簾卒立宋人列艦江上世昌

乘風縱火燒其船百餘焚城出兵鏖戰世昌創甚血漬
衣甲勇氣愈壯焚城下遷武略將軍從伯顏伐宋攻新
城世昌坎其城而登中數矢傷臂昏眩墜地少蘇復進
遂拔之明日丞相伯顏視所坎城高一丈五尺餘論功
第一從諸軍渡江抵南岸率蒙古哈必赤軍步戰大敗
宋兵斬其將一人十二年從敗賈似道於丁家州以功
賜金符十三年圍揚州世昌絕其糧道兼搜湖泊宋兵
聞鐵鎗名不敢近揚州平充四城兵馬使從平章阿朮
入覲授宣武將軍管軍總管十四年平野人原司空山
等七寨賊進安撫使佩金虎符鎮澈浦十七年拜定遠

大將軍二十三年改沂鄒上副萬戶世昌前後數百戰
徧體金瘡竟以是卒年六十一追封定海郡侯諡忠勇
子國英嗣

賀祉益都人父進元帥左監軍守淄州改千戶守膠州
祉初以質子入宿衛至元六年襲父職爲千戶仍守膠
州七年宋兵攻膠州祉固守郤之十年領舟師五百艘
爲先鋒攻五河口軍還殿後時宋兵以巨索橫截淮水
號渾江龍祉用刀斷之却其救兵清河城遂降攻高郵
寶應戰淮安城下丞相伯顏以其功上聞授武節將軍
攻泗州獲戰船五百艘還從右丞別乞里迷失入朝帝